

一貫道原典系列

三三歸一

③

不虛先生講
歸一子整理

(續上期)

源問：一期二期，去生初猶未甚遠，而每會所度僅二億，至三期則去生初愈遠，陷溺愈深，度之更不易，而謂九十二億，必在午會收圓何也？

答曰：普度收圓，真非易也，無極天尊以九二已為殘靈，一時難以喚醒，故命辰巳所度之四億，復於午會降生東土，分任三

教，各著經典，以為三期證據，多設旁門，以為收圓先聲，故午會者，夫人之所共乘，而不可錯過者也。所以然者，時至午會，六陽畢，一陰生，天開殺機，收盡惡人，以充劫運；若九十二億，不於此時度圓，則墮在劫中，沉淪何極！且人生於寅，旺於午，乘此時而普度收圓，正原人一線之生機，過此則無復歸原之期矣。此收圓所以必在午會，三期為不可失之時也。

源曰：敢問三期普度收圓者何人也？

答曰：儒教也，掌教者誰？普度乃儒童，收圓乃天元也。三期必用儒教者，儒則統一世之善男信女，無不在教中，故儒字從人從需，言原人之所需，待者此時也。蓋諸佛需此時而定果成真，殘靈需此時而歸根復命也。普度掌教，必用儒童者，儒童乃孔子分性，謂為儒教之宗，而終身童真，象坎中元陽也，故普度如採取之功，真木上升也。收圓必用天元者，天元乃彌勒化身，謂收周身之神氣，而歸於先天乾元，彌羅無間也，故收圓如周天之功，萬脈朝元也。合之乃存心養性，修身立命，無非性命雙修之學也。一期二期之仙佛，至三期而共萃一堂，道教

佛教之功修，合儒教而同歸一致，收千門，並萬教，此三期所以不僅普度，而又必收圓也。

源曰：既是儒教開普度，則一切宜從儒教，何以持齋守戒，又是佛法。

答曰：不持齋則孽賬不清，何以脫輪迴？不守戒則命根不固，何以了生死？故敦倫飭紀，一切盡從儒教，而持齋守戒，則必遵佛法，蓋聖賢仙佛，惟佛法最深、佛律最嚴、佛願最洪、佛量最大，必成佛而後能超生西天，永住極樂也。故末後一著，乃成佛之祕訣，前此未敢輕洩者，人逢三期時至，普度雖開於儒教，而三教之人，皆以成佛為要歸，所謂娑婆變為佛國也。

源曰：佛教無君臣父子，不知禮樂刑政，何可行於中國？

答曰：使佛教無君臣，則佛國應無主矣；使佛教無父子，則佛國應無人矣。何以至今猶是君臣父子相承乎！謂佛教不知禮樂刑政，不可行於中國，考佛國其先亦好殺，至佛以慈悲方便為教，故西方數十國，皆持齋戒殺，方便與人，自周至今，二千餘年，其風俗之厚猶是也。佛法既可行於彼國，而顧不可行於中國乎！謂中國有禮樂刑政，可

以致治，宜其長治久安，何以不時而革命，不時而易姓，爭奪篡弒者比比也，則中國之治，果勝於佛國乎！而謂佛法不可行中國乎？有如一曰者，聖天子倡行佛教於上，臣民皆奉行佛法於下，治之以禮樂刑政，而濟之以慈悲方便；貫三才之至理，而生天生地生人之道，舉世同修，衍三教之心傳，而抱一、歸一、貫一之功，率土共勉，遵三皈、守五戒、除十惡、去八邪、遵三畏、體九思、君仁臣忠，朝有一德之雅，父慈子孝，家無不順之虞。禮明樂備，箇箇皆履中蹈和，政簡刑清，人人盡慎獨自訟，不造酒、不飼畜，而穀不可勝食；不飲酒、不食肉，而財不可勝用，仁民愛物，食德飲和，鳥獸魚鱉，咸若其性，所謂天下一家，中國一人，萬物一體者此也。道一風同，膏一世而躋於仁壽之域，於以成萬年太平有道之長，則中國也即佛國矣，豈不休哉！豈不盛哉！

源曰：中國可為佛國，既成於儒教之開普度，則儒書所載，亦宜顯有明徵，何以此語僅見於釋典乎？

答曰：聖經自天子以至於庶人，壹是皆以修身為本，非中國化為佛國之證乎。

（續下期）